



Sesida dals

21 da zercladur 2022

Communitgà ils

22 da zercladur 2022

Protocol nr.

533/2022

Incumbensa Brunold

concernent las cundiziuns generalas per in Green-Tec-Cluster en il Grischun

Resposta da la Regenza

L'incumbensa ha la finamira d'impunder ina part dals meds finansials da l'etappa II dal Plan d'acziun Green Deal (AGD) en ils secturs da la furmaziun, da la perscrutaziun applitgada, da l'innovaziun e da la colliaziun en raits, quai cun l'intent d'establi in «Green-Tec-Cluster». Da quest cluster duain profitar particularmain las IPM en furma d'in transfer da savida e da tecnologia ed en furma da cussegliaziuns. La Regenza approva il giavisch da l'incumbensa en quel senn, ch'ils secturs da la furmaziun, da la perscrutaziun applitgada, da l'innovaziun e da la colliaziun en raits èn impurtants per cuntanscher las finamiras dal AGD.

La terminologia «Green Tec» che vegn duvrada en l'incumbensa Brunold, dumonda ina chapientscha cuminaivla da sia definiziun. «Green Tec» po vegnir duvrà sco sinonim da «Cleantec» (tecnologia netta) e represchenta l'applicaziun da process, da products e da servetschs per reducir las emissiuns e per spargnar las resursas. Tenor l'incumbensa parlamentara acceptada duai il AGD s'orientar a las finamiras dal clima prescrittas. Correspundentmain ston ils meds finansials che resultan d'in futur Fond dal clima, er vegnir duvrads uschia, ch'els gidan a cuntanscher las finamiras en moda uschè duraivla, effectiva ed effizienta sco pussaivel. Sche projects dals secturs da la furmaziun, da la perscrutaziun applitgada, da l'innovaziun e da la colliaziun en raits han ina finamira che correspunda a questa chapientscha da Green Tec, èsi – ord vista da la Regenza – acceptabel da promover in futur Fond dal clima. Activitads cun questa finamira gidan directamain u indirectamain er a proteger il clima. Dals causals da promoziun dal Fond dal clima duain far part er la colliaziun ed il barat

tranter il lieu da furmaziun e da perscrutaziun e l'economia regiunala, quai en vista a la creaziun da scolaziuns e da furmaziuns supplementaras progressivas e praticas, en vista a la promoziun da projects innovativs ed en vista a la promoziun dal transfer da savida e da tecnologia. En il rom dal AGD èn dumandadas cunzunt las federaziuns spezialisadas e professiunalas per etablir las enconuschientschas tecnicas e manualas. Igl è previs da promover ils projects correspundents en las basas legalas per l'etappa II dal AGD. En il rom da l'elavuraziun dal project legislativ per l'etappa II dal AGD, ch'è actualmain en curs, vegnan proponids criteris e cundiziuns, tenor ils quals pon vegnir retratgs da la «Finanziaziun speziala Fond dal clima» er meds finanzials a favur da mesiras en il senn da questa incumbensa.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

Marcus Caduff

Il chancelier:

Daniel Spadin